

# Pesta Silat '85: Masih ada kegagalan

24 AUG 1985

PENCINTA SENI 87/97

PESTA Silat 1985 baru saja berlalu. Soal menang atau kalah adalah adat pertandingan. Apa yang penting ialah semangat kesukanan.

Pesta Silat 1985 tidak menampakkan sesuatu kejayaan yang boleh dibanggakan oleh kita.

Masih ada kegagalan pada semua pihak yang terlibat.

Pihak penganjur tidak mengundang pengadil dari luar negeri seperti Malaysia atau Indonesia.

Jika tidak berkemampuan dari segi kewangan,

pihak penganjur sekurang-kurangnya boleh mengundang pengadil dari pertubuhan seni pertahan diri asing seperti taekwondo atau karate.

Dengan langkah ini, kita sekurang-kurangnya akan mendapat pandangan dari mereka untuk kemajuan dunia persilatan Melayu.

Di samping itu, kelayakan setengah-setengah pengadil yang diundang adalah diragui.

Umpamanya, kita tidak pernah mendengar mereka mempunyai sijil kelayakan yang diakui. Apa

yang jelas tergambar ialah soal berat sebelah masih timbul.

Selain dari itu, tidak semua peserta dapat menunjukkan persembahan yang baik. Setengah-setengahnya bertanding tanpa mempunyai semangat kesukanan.

Mungkin dalam benak mereka hanya inginkan kemenangan tanpa menyedari bahawa mereka sebenarnya bertanding secara persahabatan.

Apa yang perlu ditekan ialah pesta ini adalah untuk bersukan dan bukan menimbulkan permusu-

han.

Memukul dengan 'membabi-butakan' tanpa ingat akan batas-batasnya adalah keterlaluan. Mencederakan seseorang bukanlah bererti berjaya. Yang penting adalah mata yang dipungut melalui tendangan, tumbukan, cara mengelak dan menjatuhkan lawan.

Perbuatan mencederakan lawan secara sengaja tidak harus wujud. Ada peserta yang tidak langsung mempunyai semangat sewaktu bertanding. Mereka kurang stamina dan gerak langkah yang sumbang dapat dilihat.

Penonton juga memainkan peranan dalam sesuatu pesta yang dianjurkan. Kurangnya bilangan penonton yang hadir, walaupun percuma, menandakan ada yang harus diperbaiki.

Mengapa ini terjadi. Adakah mereka merasa malu untuk menonton cara orang Melayu bertanding? Apakah mereka menganggap para peserta itu tidak mempunyai mutu? Inilah yang perlu difikirkan oleh pihak penganjur.

Sambutan para penonton, khususnya penyokong satu-satu kumpulan silat, adakalanya keterlaluan. Sesuatu yang dilakukan secara keterlaluan, biasanya tidak mendatangkan hasil yang baik.

Jadi, para penyokong pihak yang menang tidak harus bersikap keterlaluan semasa menyambut berita kemenangan itu. Cukup sekadar sorakan yang sederhana.

Dalam hal ini, mungkin baik jika ketua sesebuah kumpulan itu dapat menanamkan sikap disiplin di kalangan anggota mereka.

PENCINTA SENI,  
West Coast Drive



● MUTU persembahan silat dalam Pesta Silat 1985 minggu lalu dikatakan tidak memuaskan.